

欲按怎幫助別人

逐家好：我是第 00 號，我今仔日欲演講的題目是

「欲按怎幫助別人」

以早的人，三不五時就會講：「食果子，拜樹頭；食白飯，拜鋤頭。」攏會記得別人對咱的好，毋過，較少咧講「欲按怎幫助別人」這種代誌。」幫助別人，是咧做好代，感覺真簡單，若「桌頂拈柑」毋免人教。毋過這馬的社會，逐家攏變做「一人一家代，公媽隨人拜。」的心態，實在是「墓仔埔淹大水。」予人足失望的。

現代人的心態是：「一句毋知，百聲無代。」叫是共別人鬥跤手，是一件「蠔仔叮牛角，無采工。」的工課。但是咱愛知影一个道理，人講：「花無百日紅，人無百日好。」有一工咱若需要別人共咱鬥相共，人敢會共咱幫助咧！所以咱愛累積行善，有錢出錢，有力出力，毋通一个錢拍二十四個結，傷過凍霜。

有一句話講：「助人是快樂之本」，有才調的人，除了顧好家己以外，閣會使幫助別人，幫助別人嘛是咧幫助家己，所以會感覺快樂。助人佻快樂，親像一個司公，一个象杯全款是分袂開的。

所以平常時仔，咱愛有「欲按怎幫助別人」的想法。親像我假日做義工、去社區掃地、捐發票、坐車讓位予人、愛心捐款---等等，攞是我能力做會到的，予細細的愛心，發揮大大的功能！

老一輩攞會講：「三年一閏，好歹照輪」，好袂好一世人，歹嘛袂歹一世人。平常時仔無欲幫助人的人，輪到歹運到的時，嘛只好過「時到時擔當，無米就煮番薯湯」的日子嚕！

我的演講就講到遮，多謝逐家！